

太平寰宇記

第十四冊

太平軍年記

卷之十

太平寰宇記卷之四十九

河東道十

代州

寶興軍

雲州

代州

代州

鴈門郡今理鴈門縣

古唐國之地禹貢冀州之域歷代所

屬與并州同春秋爲晉地其後三卿分晉其地屬

趙卽趙有代句注之北是也按河東記云代句注

在州西北三十五里鴈門縣界西陁山也初趙襄

子殺代王而取其地至趙武靈王破林胡樓煩築

長城自代傍陰山下至高闕爲塞而置雲中鴈門

代郡後北境復屬燕秦莊襄王三年攻狼孟取三十七城卽此地秦併天下爲太原鴈門二郡之地又云始皇十三年移樓煩郡于善無縣今句注山北下館城是也故續漢書鴈門郡領縣十四理陰館漢因之後漢書云建安二年又立新興郡于太原北界後廢之漢末匈奴侵邊其地荒廢魏文帝移鴈門郡南度句注置廣武城卽今州西故城是也晉如之後魏置梁城繁峙二郡于此尋廢之明帝又移置廣武東古上館城內卽今府城是也後周置肆州大象元年自九原城移肆州于此隋開

皇五年改爲代州取古代郡爲名大業中改爲鴈
門郡隋末喪亂陷于寇境唐武德元年置代州總
管管代忻蔚三州代州領鴈門繁峙崞五臺四縣
五年廢總管六年又置管代忻蔚朔四州貞觀四
年又督靈州六年又督順州十二年省順州以懷
化縣來屬今督代忻蔚朔靈五州高宗廢懷化縣
證聖元年置武延縣天寶元年改爲鴈門郡依舊
爲都督府乾元元年復爲代州

元領縣五

鴈門 五臺 崞縣 繁峙 唐林

州境

東西三百二十里 南北二百二十八里

四至八到

南至東京一千七百里

南至西京一千三百三十里

西南至長安一千六百里

東至蔚州二百六十里

南至太原府五百里

西至嵐州界一百六十里

北至朔州界一百四十六里

東南取崩石嶺至鎮州五百四十里

西南至忻州二百五十里

西北至朔州二百二十四里

東北至蔚州四百里

戶

唐開元戶一萬五千七百七

皇朝戶主三千五百六十七客二千四百一十五

風俗

鴈門并州屬郡也其風俗與太原略同然自代北至雲朔等州北臨絕塞之地封略之內雜虜所居

戎狄之心鳥獸不若歉饉則剽劫豐飽則柔從芽
報冤仇號為難制不憚攻殺所謂衽金革死而不
厭者是也縱有編戶亦染戎風比于他邦實為難
理

人物

周黨

字伯況廣武人少孤為宗人所養徵為議郎以病去職居澠池也

王霸

字儒

仲太原廣武人少有清節建武中徵到稱名不稱臣有司糾之問其故對曰天子有所不臣諸侯有所不友
趙至 字景真代州人
郝隆 字佐治崞人無書不讀

土產

麝香

天花

豹尾

地菜

鵬翎

貢

賦麻布

青碌

貢

長松子

鴈門縣

二十鄉

本漢廣武縣地屬太原郡後漢改屬鴈

門郡隋開皇三年罷郡縣屬肆州後改肆州爲代
州屬不改十八年改廣武縣爲鴈門縣避太子之
諱也又圖經云邑地井泉鹹苦民皆負輦遠汲魏
牽招爲郡鑿原爲渠注水城內迄今民賴其益
累頭山在縣西北六十里卽句注陁西北三十五
里山也石鼓山郡國志云代郡石鼓在山下橫
臥高一丈八尺腰細有過繩處覆宿山一名牛
心山一名伏牛山在縣東南十五里夏屋山一

名下壺山又名賈屋山在縣東北三十五里史記

云趙襄子北登夏屋誘代王使廚人操銅料音擊擊

殺之遂有代地 句注山一名西陁山在縣北三

十里爾雅爲北陵西隃鴈門是也注云卽鴈門山

也水經注云鴈門郡北對句注東陁其南九塞之

一也晉咸寧元年句注碑曰蓋北方之險有盧龍

飛狐句注爲之首天下之阻所以分別內外也漢

高祖欲伐匈奴不從婁敬之說械繫于廣武遂踰

句注困于平城謂此也 滹沱水在縣南 河神

祠在縣南開元九年并州長史張說奏置 龍泉

水源出縣西北平地水經注云龍泉出鴈門縣西
平地其大三輪泉源湧沸騰波奮發以巨石投之
水輒噴出亦云潛通燕京山之天池也 常溪水
郡國志云鴈門有常溪水 廣武故城漢故廣武
縣城今在郡西南漢高祖械繫劉敬于此地後敗
尋封敬以侯之又冀州圖云廣武縣城在句注陁
南口之南二十里 靈邱故城郡國志鴈門靈邱
縣有搗藥溪是也 故平城縣城後漢末立故縣
城在西南 參合城漢代郡之縣名柴武斬韓王
信于此地後廢縣城存 棗戶城隋圖經云初築

此城以地多棗樹爲名土人云此棗多輸北京

武州城在縣西六十里東魏置武州領吐京齊新

安三郡以統軍戶齊改曰北靈州是也東陁關

地甚險固在郡南二十里西陁關在縣西北五

十里武州塞在鴈門漢武時單于將十萬騎入

武州是也拓跋陵郅都墓郡國志云漢郅都

爲鴈門太守匈奴憚之不敢近塞葬鴈門墓側古

柏五千餘株今號曰郅君柏

五臺縣

東南一百二十里五鄉

本漢慮

音

虎

音

縣屬太原郡因

慮虎水爲名晉省後魏孝文帝復置卽今理是也

屬新興郡高齊改屬鴈門郡隋大業二年改爲五臺縣因縣東五臺山爲名 五臺山在縣東北一

百四十里水經注云五臺山五巒巍然故謂之五

臺晉永嘉三年鴈門郡後

音

人縣百餘家避亂入

此山見山人爲之先驅因而不返遂置巖野往還

之士稀有望見其村居者至詣訪莫知所在故俗

人以此山爲仙者之都矣 中臺山山頂方三里

近西北陬有一泉水不流謂之太華泉蓋五臺之

層秀仙經云此山名紫府常有紫氣仙人居之內

經以爲清涼山 聖人阜水經注云滹沱水東流

經聖人阜阜下有泉泉側石有十二手跡其西復有二腳跡甚大莫窮所自在縣西南四十八里

仙人山在縣東南五十里石岳上有人坐跡山腹石上有手跡山下石上有雙腳跡皆西向立 渾河出板迴山 慮虜水在縣北十五里源出縣界漢因此水以立縣 張公城十六國時石勒將張平築城東有平碑

崞縣

西南十五里八鄉

漢舊縣因山爲名屬鴈門郡漢末荒

廢晉初又置後魏改爲石城縣至東魏曾置廓州于此以廓闢土疆爲稱尋廢分爲廣安永定建安

三郡以領軍戶後齊省郡又立北顯州後周廢隋

開皇十年改縣爲平寇大業初改爲崞縣焉

崞音廓

雲中城在縣西一百里卽管涔之異名也樓

煩故城漢爲縣故城在今縣東石門關在縣西

北八十里 滹沱水在縣東二百步

繁峙縣

東六十里五鄉

本漢舊縣屬鴈門郡漢末匈奴侵寇

舊縣荒廢晉又置繁峙縣後周省隋開皇十八年

復置于今縣東六十里大堡戍大業十二年移于

武州城唐聖厯二年以縣在平川難以固守遂東

移于今理其城三面枕澗東接峻坂極爲險固

泰戲山一名武夫山亦名平山亦曰戍夫山今曰
派山在縣東南九十里山海經云泰戲之山滹沱
之水出焉郭璞注云滹沱出武夫山也 滹沱河
源出縣東南孤阜山山海經云滹沱之水東流注
于婁水冀州圖云又經繁峙故城西三里與五泉
合又西南入樓煩郡秀容界又還入崞縣又入秀
容界東北入五臺南入恆山界

唐林縣

西南一百一十里九鄉

漢廣武縣地唐證聖元年分五

臺崞二縣于忻代二州界置武延縣神龍已後改
爲唐林縣梁開平二年改爲白鹿縣後唐同光初

復舊晉改爲廣武後復舊 連枷棒山名在邑界

滹沱水在縣東

寶興軍

寶興軍者本代州烹銀之冶務劉繼元割據之時建爲寶興軍地屬五臺山寺皇朝平河東因之不改

雲州

雲州

雲中郡今理雲中縣

禹貢冀州之域虞及周屬并州之地

春秋時爲北狄地戰國時其地屬趙其後武靈王自代至高闕爲塞而置雲中鴈門代郡今州卽秦鴈門郡地在漢爲鴈門郡之平城縣也史記云漢